

Discursu PPN,

Mensajen ba Loron 30 Agostu 2019

Povu doben Timor-Leste,

Ohin ita celebra loron referendum 30 de Agostu ba dala ruanulu (20), eventua importante iha ita nia luta ba auto-determinasaun, tanba iha loron 30 de Agostu 1999 ne'e maka povu Timor-Leste hakotu terus no susar durante moris iha okupasaun nia okos, iha tinan ruanulu resin haat (24) nia laran.

Maluk sira hotu maka ha'u hadomi,

Hahú kedas husi tinan rihun ida atus sia ualunulu resin tolu (1983), ita nia komandu da luta FALINTIL, ita nia aswa'in, Maun Bot Kay Rala Xanana Gusmao trasa planu ba Referendum ida ne'e, maibé ita hotu tenke hein ho pasiénsia iha tinan sanulu resin neen (16) nia laran atu bele realiza mehi bot ba ukun an ida ne'e.

Timoroan sira hotu, feto no mane, ferik no katuas, joven no labarik, husi tasi feto to'o tasi mane, husi lorosa'e to'o loromonu, Jaku to'o Oekusi,

Selebrasaun loron referendum 30 de Agostu tinan ida ne'e, marka mós istória foun ida ba ita nia rai doben Timor-Leste, tanba iha selebrasaun tinan ruanulu ne'e, ita hetan tan vitória ida, iha ne'ebé ita konsege dada fronteira tasi nian ho nasaun viziñu Australia. La'ós koincidente, maibé realidade katak ita hein kedas tinan ruanulu atu bele atinje ita nia independénsia totál! Tanba ne'e povu tomak merese atu festeja selebrasaun importante ida ne'e!

Povu tomak maka ha'u respeitu,

Selebrasaun loron referendum 30 de Agostu ba tinan ruanulu ne'e, nu'udár mós oportunidade ida ba ita atu halo reflesaun, nune'e ita kontinua hanoin sakrifísiu martires no herois da patria sira ne'ebé fó ona sira nia vida ba ita nia independénsia. Ita nia reflesaun ba pasadu ne'e atu motiva ita oinsá ita bele halo esforsu atu kontribui ba Timor-Leste nia desenvolvimentu, atu realiza mehi husi maluk sira ne'ebé sakrifika ona sira nia moris, mehi ba Timor-Leste ida ne'ebé hakmatek, nakonu ho dame, no prósperu.

Maun, Alin, Inan no Feton sira hotu,

Atu Timor-Leste sai prósperu tuir ita hotu nia mehi no esperansa, maka aproveita okaziaun ida ne'e, ha'u hakarak bolu atensaun Timoroan sira ne'ebé oras ne'e servisu hela, atu hametin liután prinsipiu serbí no dedika-an ba ita nia rain, tanba só liuhosi servisu badinas no dedikadu maka ita bele lori Timor-Leste ba moris di'ak.

Ba joven sira ne'ebé estuda iha area oin-oin, estuda didi'ak ba hodi prepara-an atu sai estafeta ba ukun an nian, prepara-an ba, tanba Timor-Leste nia mehi atu

hetan independénsia ekonomia iha imi nia liman. Ho vitória ba Fronteira Marítima ne'ebé ita konsege ona ne'e, sei loke dalan ba imi joven sira atu sai motór ba desenvolvimento ekonomia, liuhosi indústria mina no gas ne'ebé sei hahú iha Tasi Mane!

Maluk sira hotu,

Liuhosi selebrasaun ida ne'e, mai ita hotu halo kompromisu atu hametin pás no estabilidade, liuhosi dalan hadook ita nia an husi violénsia, tane as ita nia motto "Adeus Konflitu, Benvindu Desenvolvimento," ne'ebé ita lansa dezde 2008 hafoin krize polítika militar iha ita nia rain. Mai ita hotu tau iha pratika, ambiente pás no estabilidade atu fó garantia ba desenvolvimento iha ita nia rain.

Foin-sa'e feto no mane sira maka ha'u hadomi,

Ho fenómeno violénsia entre grupu arte marsial ne'ebé oras ne'e buras iha ita nia rain, maka liuhosi biban ida ne'e, ha'u husu ba imi atu evita envolve an iha atividade sira ne'ebé la fó benefisiu ba imi, ne'ebé pelu-kontráriu, estraga imi nia an, estraga imi nia vida, no inklui estraga ema seluk nia vida.

Atividade sira ne'e maka hanesan, envolve an iha grupu arte marsial, ka grupu ransu hemu tua, ka grupu *geng*, ne'ebé fó influensia ladi'ak ba imi, nune'e halo imi la'o dook husi imi nia inan-aman nia esperansa, katak sira hakarak atu imi sai oan ne'ebé serbí di'ak família, serbí di'ak sociedade, no serbí di'ak ita nia nasaun!

Joven sira hotu maka ha'u hadomi,

Iha tinan 1999 bainhira imi nia inan-aman hakat ba urna sira atu hili ukun rasik an, karik imi balun seidauk moris, maibé, ha'u husu ba imi atu tau iha neon katak, uluk, maski iha presaun no ameasa oin-oin nia laran, sira hakat ba urna atu vota ba imi nia futuro, vota ba imi nia moris di'ak!

Tanba ne'e, dala ida tan ha'u repete ba imi atu prepara imi nia an liuhosi estuda makas iha area oin-oin, hanesan, enjeñaria sivil, enjeñaria mekánika, enjeñaria eletrónica, enjeñaria informasaun no komunikasaun, siénsia agrikultura, jeolójika, enjeñaria petróleo, medisina, siénsia ekonomia, jestaun, no seluk-seluk tan, tanba oportunidade ba imi besik daudauk ona, liu-liu ba imi ne'ebé hela iha Tasi Mane, oportunidade sei to'o iha kedas imi nia odamatan oin!

Joven feto no mane iha area Tasi Mane nian no iha territóriu tomak,

Ita nia eroi, ita nia Maun Bot Kay Rala Xanana Gusmao, ne'ebé lidera luta ba Delimitasaun Fronteira Marítima no riku soin Kampu Greater Sunrise nian, hanoin dook no hanoin hetan ona ba imi ida-idak nia futuro, hanoin kona ona imi ida-idak nia mehi ba moris di'ak.

Tanba ne'e, iha pontu importante ida iha Tratadu Delimitasaun Fronteira Marítima, Maun Bot Kay Rala Xanana Gusmao, eziye ba Australia no ba kompañia Joint Venture, atu konsidera *Local Content* ka Konteúdu Lokál husi esplorasau Mina no Gas iha Greater Sunrise, tenke fó prioridade ba imi foin-sa'e sira! Ida ne'e katak imi foin-sa'e sira maka tenke sai *jogador prinsipál* atu hola parte iha

dezenvolvimentu mina no gas ne'ebé projeta tiha ona atu halo iha area Tasi Mane, tuir Planu Estratéjiku Dezenvolvimentu Nasionál 2030!

Povu doben no maluk sira hotu ne'ebé marka prezensa iha ne'e,

Ohin ha'u ko'alia barak liu ona ba foin-sa'e sira, maibé ida ne'e la signifika katak ha'u atu esklui tiha maluk sira seluk. Tinan rua husi agora, ka iha inisiu tinan 2021, kompañia Timor Resource no Timor Gap sei halo perfurasaun ba mina matan lima iha area munisípiu Kovalima no Manufahi, ida ne'e signifika katak, sei envolve sociedade hotu-hotu atu hola parte iha dezenvolvimentu ida ne'e. Ema sira ne'ebé mai servisu iha area ne'e sei presiza forneseimentu lojístika ba sira, sira sei presiza konsumu ai-han, no nesesidade báziku seluk ba sira nia moris.

Ida ne'e katak oportunidade sei nakloke tebes ba maluk sira hotu, tanba ne'e ha'u husu ba maluk sira iha munisípiu rua ne'e, atu hahú hanoín ba oin ona oinsá prepara kondisaun, nune'e bainhira dezenvolvimentu ba mina matan lima ne'e hahú karik, ita bot sira mós preparadu no pruntu ona atu kontribui, nune'e bele hadi'ak ekonomia uma kain ida-idak nian!

Maluk sira hotu,

Atu remata, ha'u hakarak husu ba ita hotu iha ne'ebé marka prezensa iha ne'e, no ba maluk sira ne'ebé asiste iha Territóriu tomak, atu mai ita hamutuk agrade-se ba ita nia funu na'in sira ne'ebé fó ona sira nia vida atu ohin loron ita bele moris iha independénsia nia laran. Mai ita hotu fó omenajen ba sira ne'ebé mate tiha ona, husi tinan 1975 to'o 1999 tanba kauza husi funu naruk ba ita nia liberdade. Liu-liu, mai ita hotu halo esforsu, servisu hamutuk, hadook an husi violénsia, ódiu, no vingansa, garante estabilidade polítika no seguransa, atu nune'e ita bele atinje ita nia objetivu dezenvolvimentu tuir Planu Estratéjiku Dezenvolvimentu Nasionál.

Mai ita fó onra ba matebian sira, ba eroi sira, no liu-liu hatudu ba Mundu Tomak katak Valapena ita sakrifika no terus ba ukun rasik an, katak valapena iha loron 30 Agostu tinan ruanulu liubá, ita habai an iha loron laran hodi vota ba UKUN RASIK AN!

Viva Timor-Leste! Viva Povu Timor-Leste! Viva Aswa'in Martires no Eroí da Patria sira hotu!

Manufahi, 16 de agosto de 2019